

四庫全書

史部

欽定四庫全書

欽定重訂契丹國志卷十二

天祚皇帝下

癸卯

保大三年春正月金帝入居庸關晡時到燕蕭后聞

居庸關失守夜率蕭幹及車帳出城聲言迎敵實欲出
奔國相左企弓等辭於國門后曰國難至此我親率諸
軍為社稷一戰勝則再見卿等不然死矣卿等努力保
吾民毋使濫放殺戮言訖泣下后纔行五十里金人遊

騎已及城左企弓等方修守具忽報統軍蕭伊遜啟城門金人前軍已登城矣於是左企弓虞仲文曹勇義劉彥宗蕭伊遜等迎降出丹鳳門毬場內投拜金帝戎服坐衆呼萬歲皆伏拜待罪於下譯者曰我見城頭砲繩葦角都不曾解動是無拒我意也並放罪 夏四月金

人以燕京及涿易檀順景薊州歸於宋宋遣王安中知

燕山府

按原書於後六月內叙蕭幹兵起宋人謀棄燕事而不及金人以燕山歸宋一節遂使情事首

尾不明詳畧殊甚今據宋史本紀增入

初蕭后東歸以避金人至松亭

闕議所往耶律達實林牙遼人也欲歸帝於夾山四軍
大王蕭幹奚人也欲就奚王府立國有宣宗駙馬都尉
伯特曰今日固合歸帝然而有何面目相見林牙命左
右牽出斬之傳令軍中有敢異議者斬於是遼奚軍中
列陣相拒而分矣遼軍從林牙挾蕭后以歸帝於夾山
奚渤海軍從蕭幹留奚王府幹據府自立僭號為神聖
皇帝國號大奚改元天興

按遼金二史蕭幹稱帝在是
年之五月此係追叙之詞又

天興遼史作天復宋元

通鑑作天嗣未知孰是

時奚中闕食遂率兵出盧龍

嶺攻破景州殺守臣劉滋通判楊伯榮又敗常勝軍張
令徽劉慶仁軍於鴈門鎮攻臨蘄州守臣高公輔棄城
走又寇掠燕城其鋒銳甚有涉河攻汴之意宋人情洶
洶頗有謀棄燕者童貫自京師移文王安石中郭藥師切
責之會奚兵過郭藥師戰於腰鋪大敗而歸藥師乘勝
追襲過盧龍嶺殺傷過半從軍老小車乘就糧於後者
悉為常勝軍所獲因而招降到奚渤海漢軍五千餘人
諸軍既失老小忿怨為蕭幹所誤為其部曲持爾格殺

之傳首於河間府

案蕭幹兵敗為部曲所殺其事在是
之秋此因上文言幹稱帝遂終言之

爾

宋安撫使詹度獻於朝宋徽宗御紫宸殿受賀蕭幹

既敗於腰鋪其黨德哩布在峯山亦敗太宗尊號寶檢

及契丹塗金印皆為宋所獲常勝軍因此橫甚藥師復

佐之宋人不能制 耶律達實林牙領兵七千到夾山

按宋元通鑑宣和五年金襲遼獲林牙耶律達實六年

遼主渡河達實自金來歸宣和五年當遼保大三年六

年當遼保大四年遼史達實傳金祖入居庸關達實自

古北口亡去為羅索所獲益是年達實從蕭后避敵旋

又被獲至明年乃自金歸也又遼史本紀於保大四年

正月云先是達實林牙為遼所執數月復歸考達實被

執在保大三年之夏而紀云數月復歸似不待四年之秋矣然蕭后自燕京避金即歸帝於夾山而達實敢執復歸則必不得與蕭后同歸帝此書言達實歸帝在三年之夏又云達實到夾山帝命殺燕后又似達實與蕭后同時歸帝不無外說但諸書未達實事俱不其明今姑仍舊文而辨正之

帝命殺燕后并外

甥常格餘免本罪 張毅者平州人也登進士第建福

元年授遼興軍

遼興軍乃平州地也

節度使因鄉兵經過殺節度

使蕭迪里全族二百口劫掠家貨數十萬鼓以鄉人能

招安息亂以功權知平州事燕王卒毅度契丹必亡籍

管內丁壯充軍得萬人馬一千尺招豪傑潛為一方之

備蕭太后嘗遣太子少保時立愛知平州毅有不容之意由是立愛常稱疾不出毅依舊權知州事會金人下燕尼雅滿首以張毅事問參知政事康公弼公弼曰張毅狂妄寡謀雖有兵數萬皆鄉民器甲不備資糧不給彼何能為示之不疑圖之未晚也尼雅滿召時立愛赴軍前進加毅為修海軍節度使依舊知平州事將發燕民由平州歸國尼雅滿謂左企弓曰我欲遣精兵二千餘騎先下平州擒張毅何如左企弓輩以為然獨康公

弼曰若加之以兵是趣平州叛也公弼舊為平州守臣願往伺之遂授以金牌馳騎見設諭以尼雅滿之意設曰契丹天下八路七路已下獨一平州敢有異志所以未解甲者北防蕭幹侵掠故也厚賂而歸報曰彼無足慮尼雅滿信之遂改平州為南京復加同中書門下事判留守事而實欲圖之也 五月金太祖自燕山北追

天祚以疾崩於軍中謚為大聖武元皇帝弟烏奇邁立

是為太宗

按金史太祖以是九月崩宋史與此書皆書於五月蓋太祖以是年夏在軍中得疾必有

記傳其崩者故宋人承而書之此宋史與隆禮書之所由誤也今姑仍舊文而辨正之 左企弓等

文武百官并被擄燕民由平州歸國燕民入平州境私訴於毅曰左企弓不謀守燕而使吾民遷徙流離不勝其苦今明公臨巨鎮握強兵盡忠大遼必能使我復歸故土而人心亦有望於公也毅召諸將議皆曰近聞帝軍復振出沒於松亭之南金人所以全軍急趨山西者恐遼議其後也若明公仗義迎帝以圖興復先責左企弓等叛降之罪而戮之盡放燕人歸業宋人必無不納

則平州為藩鎮矣假如金人復來加兵內用平州之兵外借宋朝之援又何懼焉穀曰此大事不可草草翰林學士李石智而多謀可邀之密議石之謀與之陰合次日遣將官張謙領五百騎傳留守令名宰相左企弓曹勇義樞密使虞仲文參知政事康公弼至於灤河西岸聽候差議事官趙疏往數其十罪曰天祚播遷夾山不即奉迎一也勸皇叔燕王僭號二也誡許君父降封湘陰王三也天祚嘗遣知問王有慶前來計議而殺之四

也檄書始至而有迎秦拒湘之議五也不謀守燕而拜
降六也臣事金國而不顧大義七也根括燕中財物取
悅金人八也致燕民流徙而失業九也教金主發兵先
下平州十也衆皆無對遂縊殺之 六月鼓榜示燕人
除留守外盡許復業所有逐戶拋下田宅為常勝軍占
佃者悉還之燕人方患遠徙得歸復業皆大悅宋徽宗
聞燕民之歸降詔付帥臣詹度多方存恤有官者津遣
赴闕換授差遣餘各令安業與免三年常賦穀聞之喜

為得計遂以平營灤三州降宋其地乃後唐末太祖所
取非石晉所割灤州乃太祖建立也詹度得張穀納土
書不敢受密奏於朝仍語穀毋遽恐為金人所知金帝
聞之遣棟摩國王將騎三千來問罪穀帥兵拒於營州
棟摩以兵少不交鋒而歸大書州城門曰夏熱且去今
冬再來穀即妄以捷聞於宋邀求銀絹數萬匹并誥勅
數道犒賞張穀之拒金人也外則納款於宋通好於
蕭幹而救緩急內則奉安天祚帝畫像凡舉事先白而

後行仍用遼國官秩稱保大三年遣人奉迎帝以圖興
復是時有燕人李汝弼者即翰林學士李石也高黨者
三司使高履也二人先嘗被擄後緣張穀放歸往見宋
宣撫王安中勸宋朝密納之燕山路轉運趙良弼力爭
以為不可恐開金人禍端乞斬汝弼以徇宋朝不從授
穀泰寧軍節度使世襲平州其屬張敦固等皆擢待制
穀得宋詔喜率官屬郊迎金人知之以千騎襲破平州
穀挺身走欲間道歸汴為郭藥師所擒由是金人乃歸

曲於宋移檄索取宋朝不得已命王安中縊殺之以水

銀漬其首函送平州

按張毅之死宋史書於是年十一月此亦因上文言毅事而終言之

政總除於夏五月之下爾

秋八月朔日食陰雲蔽之不見是歲

金太宗天會元年

甲辰保大四年秋七月金人陷應蔚等州是秋帝得耶

律達實林牙兵歸

按上年達實林牙自古北口去為金所獲并降其衆是年又自金歸此

書不書達實被獲事今附識於此以備一事之首尾云

又得陰山室韋齊克紳兵

自謂天助中興再謀出兵收燕雲達實林牙力諫曰自

金人初陷長春遼陽兩路則駕不幸廣平淀

常歲受禮處

而

都中京及陷上京則都燕及陷中京則都雲中及陷雲

中則都夾山向以全師不謀戰備以至舉國漢地皆為

金人所有今國勢微弱至此而力求戰非得計也當養

兵待時而動不可輕舉帝斥而不從達實林牙托疾不

行帝遂強率諸軍出夾山下漁陽嶺取天德軍

遼國改豐州也

東勝寧邊雲內等州南下武州遇金烏紳戰於雅哈下

水烏紳帥山西漢兒鄉兵為前驅以女直千餘騎伏山

間出室韋齊克紳兵後齊克紳兵顧之大驚皆潰帝奔
竄入陰山金人以力不能入恨其不出謂出必得之天
祚亦畏尼雅滿兵在雲中故不敢出久之間尼雅滿歸
國以烏紳代戍雲中乃率韃靼諸軍五萬并攜后妃二

子秦王趙王及宗屬南來

按遼史本紀保大三年金圍
鞬重於青塚硬寨秦許二王

及諸妃公主皆陷沒又列傳秦許趙三王從上至白水
寨皆為金兵所獲白水寨之敗亦保大三年事也隆禮
於此年謂帝攜后妃秦趙二王南來疑屬認誤原書此
下又云遼寶林牙諫之不聽考遼史遼寶林牙前諫天
祚帝不聽攝疾不行自立為王率兵北行
先為西遼之始初無再諫之事今刪去

越漁陽嶺而

尼雅滿已回雲中帝復奔山金司

按原書比下連天作帝被獲並為四年事

考遼史帝被獲在

明年之春今改正

乙保大五年春正月党項

按原書無此二字則所謂請帝臨其地者未知何地今據

遼史補

小呼嚕請帝臨其地帝與之謀歸宋又恐不可仗

乃謀奔夏國計未決小呼嚕密遣人遞報尼雅滿先遣近貴諭降未復而金使羅索馳騎而至跪於帝前曰奴婢不佞乃以介冑犯皇帝天威死有餘罪因捧觴而進遂俘以還削封海濱王送長白山東築室居之遼國遂

滅金皇統五年改封帝豫王五年薨

按原書云踰年乙巳而沮蓋隆禮誤

以天祚帝被獲在保大四年甲辰故以乙巳為踰年也然考遼史天祚帝入遼後改封豫王至皇統五年乃薨

今補

先是宋徽宗崇寧年間

按此書天祚帝紀林摠來使在乾統五年當宋

正

徽宗崇寧四年與宋史徽宗紀及摠本傳皆合原本作大觀誤今改正

林摠來使命其習

儀摠惡其繁瑣以惡語詆伴使帝曰兄弟之邦臣吾臣

也今辱吾左右與辱吾同欲殺之在廷泣諫乃止及帝

在山金司技窮欲歸宋因思往事恐宋人未必加禮乃

走小博囉復不納至夜而歸欲復之雲中天未明遇謀

者言羅索軍且至天祚大驚時從騎尚千餘有精金鑄
佛長大有六尺者他寶貨稱是皆委之而遁值天雪車
馬皆有轍迹遂為金兵所及初金人入攻時災異屢見
曾有人狂歌於市曰遼國且亡急使人追之則人首獸
身連道且亡二字迸入山中不見變異如此與亡之數
豈偶然哉

欽定重訂契丹國志卷十二

欽定四庫全書

欽定重訂契丹國志卷十三

后妃傳

太祖淳欽皇后舒魯氏

按原書后妃傳標題俱作某帝某皇后於史例

不合今
並改正

太祖皇帝后舒魯氏本國契丹人也勇決多權變太祖行兵御衆后常預其謀太祖嘗度磧擊党項留后守其帳黃頭臭洎二室韋乘虛合兵掠之后知之勒兵以待

其至奮擊大破之由是名震諸夷時晉王李存勗

按原書但

云晉王不著其名考通鑑徐唐莊宗今增

方經營河北欲結契丹為援嘗以

叔父事太祖以叔母事后劉守光末年衰困遣參軍韓

延徽求援太祖怒其不拜留之使牧馬於野后言於太

祖曰延徽能守節不屈此今之賢者奈何辱以牧圉宜

禮用之太祖召延徽與語悅之用為謀主後為名相吳

王遣使遺太祖以猛火油曰攻城以油然火焚樓櫓敵

以水沃之火愈熾太祖大喜即選騎二萬欲攻幽州后

晒之曰豈有試油而攻一國乎因指帳前樹謂太祖曰
此樹無皮可以生乎太祖曰不可后曰幽州城亦猶是
耳吾但以三千騎伏其傍掠其四野使城中無食不過
數年城自困矣何必如此躁動輕舉萬一不勝為中國
笑吾部落亦解體矣太祖乃止其平渤海后預有謀太
祖之崩也后任智用權立中子德光是為太宗后稱太
后左右有桀黠者后輒謂曰為我達語於先帝至墓所
即殺之前後所殺以百數最後平州人趙思溫當往思

溫不行太后曰汝事先帝親近何為不行對曰親近莫如后后行臣則繼之太后曰吾非不欲從先帝於地下顧諸子幼弱國家無主不得往耳乃斷一腕置墓中思

溫亦得免朝野號為斷腕太后後上京置義節寺立斷

腕樓且為樹碑

案原書敘斷腕事前後
復見殊不明晰今改正

太宗與晉主重

貴構怨用兵連年中國疲弊契丹人畜亦多死國人厭苦之太后曰漢兒何得一餉眠自古道但聞漢和蕃不開藉和漢漢兒果能回意我亦何惜與和

案原書自川
兵連年以下

所叙與太宗紀複見
今稍節之以從簡要
其後晉果來請和卑辭謝過疑其

語忿謂無和意乃止太宗自大梁回師崩於鎮城諸將
奉東丹王托雲之子烏雲為帝太宗喪至國太后不哭
曰待諸部寧一如故則葬汝矣先是太祖崩於渤海太
后殺諸將數百人太宗崩諸將懼死乃謀奉烏雲勒兵
北歸太后聞之大怒發兵拒之烏雲以偉王為前鋒相
過於石橋李彥韜本從晉主北遷是時隸太后麾下為
排陣使迎降於偉王太后兵由是大敗烏雲幽太后於

太祖墓側居之穆丹河

太宗靖安皇后蕭氏

太宗皇后蕭氏涿州人遼興節度使蕭延思之女也契丹所貴惟耶律與蕭二姓后一入宮正位椒房凡后族皆以蕭為氏后之生也有異於常及長聰慧美姿容帝甚寵敬之生二子長曰舒嚕即穆宗舍音篡弒之時衆所擁立次曰蒙古太宗南入大梁舒嚕后專秉國事后無所預弟蕭翰性殘忍后每戒其多殺太宗崩於鎮城

后時在國後崩與帝合葬暨穆宗即位立陵廟建碑頌

德

世宗皇后甄氏

按遼史稱世宗妃甄氏今考甄氏雖本宮人但世宗已立為后

未可遽沒其實
今仍隆禮所書

世宗皇后甄氏後唐潞王時為宮人世宗從太宗南入

大梁得之宮中時后年四十歲世宗幸之生六子長曰

密結後即位為景宗次日平王荆王吳王寧王河間王

按遼史世宗惟三子甄后止生寧王此所言與
史抵牾之甚今姑仍之而附識其異同於此

世宗既

登位冊為皇后后少而端重風神閒雅暨正椒房繩治有法自太祖太宗連年征戰驅馳戎馬曾無寧歲至帝

嗣位為部族所推而神志昏惰

按原書此下有國人至以睡王目之句考睡王

乃穆宗遼史及此書穆宗紀並同隆禮所載前後矛盾今刪正

后性嚴明宮庭之內不

可干以毫髮私南朝喪亂劉知遠郭威代興自稱為帝

帝承強盛之餘憤憤無立志后與參帷幄密贊大謀帝不能用奄奄歲時既而有火神浣之弒后并及焉其後

景宗為羣臣推立葬后於豎巫閭山立陵其側建廟樹

碑 碑文翰林學士李昉所撰

穆宗皇后蕭氏

穆宗皇后蕭氏幽州厭次人父知璠內供奉翰林承旨
后初產之日有雲氣馥郁久之幼有儀觀進趨軌則帝
居藩時納為妃暨即位后正中宮是時契丹繼代恬安
兵勢少弱南唐北漢及南朝藩鎮李守貞之類皆用蠟
丸帛書求援以為強帝不能應之后性柔婉亦不能規
正黑山之弒帝酗忍罹禍焉后無子衆共推立景宗

景宗睿智皇后蕭氏

景宗皇后蕭氏諱燕燕侍中守尚書令蕭守興之女也或以為北宰相蕭思溫女景宗自幼年遭火神淀之亂

世宗與后同時遇害帝藏積薪中因此嬰疾及即位國

事皆決之蕭守興以后父超封魏王

按遼史封魏王者即蕭思溫非蕭守

興與此不同

共決大政景宗崩后領國事稱太后凡四子長

名隆緒即聖宗次名隆慶小名菩薩努

按菩薩努史作善賢努

封

秦晉王次名隆祐小名果勒齊封齊國王次正格八月

而天女三人長曰延格適后弟北宰相瑠珠格署駙馬

都尉次曰壽努適后姪東京留守伯頁母弟克特壽努

出獵為鹿所觸死后即縊殺克特以殉葬

按遼史公主表齊聖皇后

三女長觀音女下嫁蕭繼先次長壽女下嫁蕭伯頁三
廷壽女下嫁蕭恒德此書惟言二女而公主與尚主者
之名亦皆不同又按史蕭伯頁傳伯頁以太平三年薨
在齊聖皇后崩之後則非為后所縊蕭恒德傳言公主
恚而死后賜恒德死則似后所縊死者乃尚第三女之
恒德也史言主恚而死此書言為鹿所觸死朕之情事
亦史為近是大抵此書於皇子公主外戚之名字封爵
多與遼史不同遼史雖為可據亦頗疎畧不備故仍存
原書以資參考而

謹志其異同云

后有妙二人長適齊王王死自稱齊

妃領兵三萬屯西鄙驢駒兒河嘗閱馬見番奴達蘭阿
巴姿貌甚美因召侍宮中后聞之繫達蘭阿巴扶以沙
囊四百而離之踰年齊妃請於后願以為夫后許之使
西征韃靼盡降之因謀帥其衆奔瓜勒察國結兵以篡
后后知之遂奪其兵命領幽州次適趙王王死趙妃因
會飲毒后為婢所發后酖殺之后天性忤忍陰毒嗜殺
神機智畧善馭左右大臣多得其死力統和年間舉國
南征后親跨馬行陣與帝提兵初趣威虜軍順安軍東

趣保州又與帝及統軍順國王達蘭合勢以攻定州餘
衆直抵深祁以東又從陽城浞綠胡盧河踰關南抵瀛
州城下兵勢甚盛后與帝親鼓衆急擊矢集城上如雨
復自瀛州抵貝冀天雄宋人惶遽真宗親幸澶淵因王
繼忠通好得宋歲幣皆后之謀也國中所管幽州漢兵
謂之神武控鶴羽林驍武等皆后自統之其將有南北
皮室當直錫里等是時聖宗年少宋使臣曹利用張皓
之議和皆后與帝引至帳前問勞館設左飛龍使韓杞

至宋朝先授帝書再拜跪奏云太后令臣上問皇帝起居此可以知太后專其政人不畏帝也是年帝上后尊

號曰睿德神畧應運啓化法道洪仁聖武開統承天皇

太后

按遼史統和五年上皇太后尊號曰睿德神畧應運啓化承天皇太后此書言澶淵講和之年上皇

太后尊號多法道洪仁聖武開統八字則是統和二十二年又加上尊號而遼史失書

自南北通

和後帝行幸多在中京武功殿聖宗居之文妃殿太后居之好華儀而性無檢束每宴集有不拜不拱手者惟后願固盟好而年齒漸衰宰相耶律隆運專權寵榮終

始朝臣莫及焉其後歸政於帝未踰月而崩臨朝二十

七年年五十七謚曰聖神宣獻皇后重熙二十一年改

謚睿智

按原書不言重熙改謚今據遼史補

聖宗欽哀皇后蕭氏

聖宗皇后蕭氏父托和追封陳王后性慎靜寡言聖宗

選入宮生珠巴克即興宗次日塔塔濟又公主二人冊

為順聖元妃三兄二弟皆封王姊妹封國夫人弟托克

索又尚燕國公主兄嘉哩尚平陽公主

按遼史公主表無平陽公主

欽定四庫全書

欽定重訂初丹國志

卷十三

八

辰陸尚南陽公主皆拜駙馬都尉又納兄孝穆女為與

宗后

按遼史孝穆為太后弟又此書蕭孝穆傳孝穆小字辰陸此傳言辰陸尚主又言孝穆女為帝后又

似二人亦未知孰是

弟果濟女為帝弟妃

按遼史蕭果濟亦尚主

前後恩賜

不可紀極諸連姻婭並擢顯官齊天后蕭氏本正后也

屢誕皇子不育聖宗顧待隆渥元妃妬忌媚寵讒毀百

端聖宗終不之信聖宗崩元妃為太后乃殺齊天后詳

見帝紀后殘忍陰毒居喪未及一年先朝所行法度變

更殆盡不俟聖宗服闋加尊號曰法天皇太后駙馬蕭

克持一子必塔自景宗朝承天后禳育之逮至成人聖

宗思視比之皇子尚國公主

按此言尚國公主不言何國考遼史公主表聖宗女

秦國公主與宗封東國長公主下嫁蕭必塔又蕭必塔碑必塔育于禁掖尚秦晉公主以功封蘭陵郡王欽哀攝政殺之表云東國長公主傳云秦晉公主未知孰是

後平渤海勲業隆重封蘭

陵王后兄弟娼而殺之連坐如穆齊爾太師觀音太師

彌勒太師等十餘人一皆功臣駢首誅夷內外嘆憤犯

賊等人累朝切齒雖經赦宥並不叙用山陵未畢后以

洗滌用之一一擢諸清途毛克和等四十人后家奴隸

欽定四庫全書

欽定重訂興舟國志

卷十三

九

咸用勞績皆授防團節度使至於出入宮掖詆慢朝臣
賣官鬻爵殘毒蕃漢自是幽燕無行之徒願沒身為奴
者衆矣后姊秦國夫人早年嫠居艷醜私門后見長沙
王謝家努瑰偉美姿容為殺其妃而以秦國妻之后妹
晉國夫人喜戶部使耿元吉貌美后從晉國之請亦為
殺其妻妻之淫虐施行刑政弛紊南北面蕃漢公事率
其弟兄掌握之凡所呈奏弟兄聚議各各弄權朝臣朋
黨每事必知太后臨朝凡四年興宗方幽而廢之國中

已困矣太后之未廢也諸舅以次權勢熏灼帝懼內難
乃與殿前都點檢耶律吉遜護衛太保耶律阿爾三等
定謀廢后召硬寨蘇拉護衛等三百餘人帝立馬於行
宮東之二里小山上吉遜等直入太后宮驅后登黃布
車幽於慶州諸舅以次分兵捕獲或死或徙餘黨並誅
是時乃重熙之三年也法天既廢仍詔靈州節度使內
庫都點檢王繼恩內侍都知監門衛大將軍趙安仁監
南北而蕃漢臣僚凡不便軍民三十餘事並立改之後

數年帝聽講報恩經感悟迎回太后

興宗仁懿皇后蕭氏

興宗皇后蕭氏應州人儀天皇后弟樞密楚王蕭孝穆之女也容貌兼美曲盡和敬生二子長曰洪基即道宗

次曰赫爾根名洪道封晉王

按遼史懿仁皇后生三子長道宗次和囉噶初封越

王徙王魯進王東魏三阿璉封許王徙王陳又徙王秦進封秦越進封秦魏此但言二子又所封國與遼史亦異今姑仍之以備參考 帝酷好沙門縱情無檢后每伺帝有所失

隨即匡諫多所宏益道宗即位尊為睿聖洪慈順天皇

太后

按遼史后妃傳清寧二年前上皇太后尊號曰慈懿仁和大惠孝敬廣愛宗天皇太后與此不同蓋此

所載為初上尊號而史所載乃加上者也道宗紀清寧三年五年皆行皇太后再生禮其加上尊號疑在此時

而史不書又以宗天之號即為

太康二年后崩與興宗

清寧二年所上蓋其訛畧耳

合葬

按原書作清寧五年崩與遼史不合今改正

道宗宣懿皇后蕭氏

道宗皇后蕭氏欽哀皇后弟樞密使惠之女也

按原書載后世

系舛誤今據遼史改正

后生有神光之異後入宮為芳儀進位昭

儀生崆郭囉是為秦王後名元吉

按遼史宣懿皇后生一子名濬初封梁王

尋立為皇太子以讒被廢薨天祚立追謚大孝順聖皇帝廟號順宗啞郭囉疑太子濟之小字而元吉則其字與史言初封梁王此言秦王亦不同姑仍舊文以備參考餘子皆不育道宗登位后

正位中宮性情恬淡寡欲魯王宗元之亂道宗與同射

獵內外震恐未知音耗后勒兵鎮帖中外甚有聲稱按遼史與

宗后傳云重元及后親督衛士破逆黨而道宗后無勒兵事此云宗元之亂道宗后勒兵鎮帖中外疑鄰國傳聞誤以與宗后督戰為道宗后勒兵也今姑仍舊文而辨正之太康元年為宮婢所誣

賜自盡乾統初追謚宣懿合葬慶陵按遼史道宗后被誣賜死至天祚帝

立乃追謚合葬原書但云後崩葬祖州殊為疎舛今改正

天祚帝皇后蕭氏

天祚帝后蕭氏平州人節度使蕭噶拉之女也奉先保
先兄弟皆緣后寵柄任當朝后性閑淑有則度遭金人
起兵天祚荒淫后不能違以至禍敗焉山金司之禍后
并被擒尼雅滿納為次室其後耶律伊都雲中起兵烏
紳誅伊都并及於后烏紳回至燕山請罪於尼雅滿曰
蕭氏契丹天祚元妃也與兄實乃仇讐不得已而從彼
素忍死以待兄者將有待於今日也今既見事無成恐

或不利於兄且兄橫行天下萬夫莫當而此人惟幄之間可以寸刃害兄於不測矣事當預防以愛兄故已擅

殺之尼雅滿起而謝之既而泣下

按遼史天祚皇帝后蕭氏傳但云從帝西

狩以疾崩與此不同考后以大安三年入宮至天祚帝之七年既五十餘矣尼雅滿何以又納為次室而寵愛之耶尼雅滿所納蓋天祚帝宮嬪傳聞者誤以為后耳今姑仍舊文而辨正之

天祚帝文妃蕭氏

天祚帝文妃國舅大父房之女

按原書載文妃世系舛誤今據遼史改正

幼

選入宮聰慧閑雅詳重寡言天祚登位冊為文妃生晉

王王妃自少時工文墨善歌詩見金兵侵迫而天祚醉
心畋遊不以為意一時忠臣多所疎斥時作歌詩以諷
諫曾有歌云莫嗟塞上暗紅塵莫傷多難畏女真不如
塞却奸邪之路今選取好賢臣直是卧薪嘗膽今邀壯
士之捐身便可以朝清漠北今夕枕燕雲詞多不備載
其諷切不避權貴如此又曾作詠史詩云丞相來朝劍
佩鳴千官側目寂無聲養成外患嗟何及禍盡忠臣罰
不明親戚並連藩屏位私門潛蓄爪牙兵可憐昔代秦

天子猶向宮中望太平其詩之感烈有如此者天祚見而銜之是時喪郡縣幾盡天祚遊畋不輟嘗有倦勤意諸子中惟晉王最賢蕭奉先乃元后兄深忌之會文妃之姊適耶律達喀拉妹適耶律伊都奉先誣告伊都欲立晉王尊天祚為太上皇帝於是戮達喀拉并其妻文妃與晉王相繼受誅

按原書於諸傳每卷終皆系以論而辭旨並淺陋今悉刪去

欽定重訂契丹國志卷十三

欽定四庫全書

欽定重訂契丹國志卷十四

諸王傳

大獻欽義皇帝

按原書以東丹王標傳日據下
文自在太子稱皇帝隆祐稱皇

太弟皆其追加之號不應托雲獨異
今改稱大獻欽義皇帝以符體例

東丹王名托雲太祖長子母曰舒魯氏太祖攻渤海拔

其扶餘城更名曰東丹國命托雲鎮東丹號人皇王

按

餘城非東丹國已
於太祖紀內辨正

時唐明宗初年也太祖崩於渤海舒

自
卷十四
噶后使少子安圖少君守東丹

按舒噶后惟三子長為人皇王倍次為太宗次

為自在太子洪吉無名安圖者安圖乃德祖之少子太祖之弟非舒噶后子也但隆禮此語本沿通鑑今姑仍

其舊而辨
正之云

與托雲奉太祖之喪發渤海先是托雲鎮東

丹時乃舊渤海國亦有宮殿被十二旒冕服皆畫龍象

建元甘露稱制行令凡渤海左右平章事內相已下百

官皆其國除授歲貢契丹國細布五萬疋麁布十萬疋

馬一千匹至是舒噶后愛中子德光立為天皇王稱皇

帝

按原書此處叙舒噶后立太宗事與太宗紀並同今節刪以首繁複

太宗既立托雲見

疑以東平為南京命徙居之又置衛士陰伺動靜唐明宗聞之遣人跨海持書密召托雲托雲謂左右曰我以

天下讓主上今反見疑不如適他國以成吳太伯之名

遂帥部曲四千人越海自登州奔唐

按原書叙托雲奔唐之由情事不備

又謂托雲初奔唐為邏者所獲遣還東丹其後復帥眾奔唐考之於史亦無兩次奔唐之事今據遼史增改

賜姓東丹名慕華以為懷化節度使瑞慎等州觀察使

其部曲及先所俘將特哩衮等皆賜姓名特哩衮姓狄

名懷惠次年明宗更賜東丹慕華姓名曰李贊華長興

三年以贊華為義成節度使選朝士為僚屬輔之贊華但優游自奉不務政事明宗嘉之雖時有不法亦不問以莊宗後宮夏氏妻之贊華好飲人血姬妾多刺臂以吮之婢僕小過或抉目或刃刳火灼夏氏不忍其殘奏離婚為尼贊華之歸唐也乘船踰海因於海岸立木為碑惟書二十字詩云小山壓大山大山全無力羞見故鄉人從此投外國贊華性好讀書不喜射獵初在東丹時令人齎金寶私入幽州市書載以自隨凡數萬卷置

書堂於盤巫間山上扁曰望海堂

以南至海二十里有望海寺也唐潞

王末年石晉內叛乞援太宗潞王已危乃遣宦者秦繼

旻皇城使李彥紳殺之贊華遇害於其第石晉詔贈贊

華燕王遣使送其喪歸國其後太宗破石晉入中原求

得李彥紳秦繼旻殺之以其家族財物賜東丹王子烏

雲莖王於盤巫間山諡曰文武元皇王烏雲後即位為

世宗加號讓國皇帝統和中更諡文獻重熙增諡文獻

欽義皇帝廟號義宗

按遼史東丹王被害石敬瑭以王禮權屠太宗改葬於盤巫間山原

書謂世宗葬之又不載統和重熙增
更謚號並為踈外今據遼史增改

章肅皇帝

按原書稱恭順皇帝考遼史洪古後改謚章肅自應以後謚為定今改正

自在太子名洪古

按原書曰名阮阮乃世宗諱非自在太子名也今據遼史改正太祖

第三子母曰舒魯氏少豪俠有智略善彈工射太祖奇

之曰吾家鐵兒也征渤海時山坂高峻士馬憚勞苦太

子徑於東谷緣崖而進屢戰有功後渤海平封為自在

太子尋薨

按遼史洪古至世宗時下獄死去平渤
海時遠甚此云尋薨蓋亦傳聞之誤

葬於

祖州統和中追謚曰欽順皇帝一子蘇拉封趙王為景

宗所誅

按通史蘇杜以謀亂被誅原書作為景宗所害誅為悖理今改正

重熙二十一

年更謚洪古曰章廟

孝文皇太弟

孝文皇太弟隆慶小名菩薩努母曰蕭氏景宗第二子
生而岐嶷儼若成人幼時與羣兒戲為行伍戰陣法指
揮意氣無敢違者景宗奇之曰此吾家生馬駒也長善
騎射驍捷如風定州之戰隆慶封為梁王加兵馬大元
帥從其母蕭后以行力戰深入與擒王繼忠有功拜南

京

按原書誤作西京
今據遼史改正

留守封秦晉國王又拜尚書令尋

薨葬祖州謚曰孝文皇太弟

齊國王隆祐

按原書訛作隆裕
今據遼史改正

齊國王隆祐小名果勒齊母曰蕭氏景宗第三子性沈毅美姿容始封鄭王遙授西南面招討使拜吳國王自

少時慕道見道士則喜後為東京留守崇建宮觀備極輝麗東西兩廊中建正殿接連數百間又別置道院延接道流誦經宣醮用素饌薦獻中京往往化之後蕭太

后一年而薨追封齊國王

魯王宗元

魯王宗元興宗同母弟也少而雄健很復過人始封鄭王又加兵馬大元帥封晉國王性極殘忍每出一囚犯死罪者命衆集射斬而鬻之流血滿前飲啖自若意氣不臣每伺時釁道宗嗣立奉長樂之命以為皇叔後因遊獵伺間弑帝左右遮救得免宗元併其子洪孝俱伏

誅

晉王宗懿

晉王宗懿小名察克齊聖宗弟孝文皇太弟隆慶之子也少有氣局幹畧過人聖宗推愛諸姪每誡之曰汝勿

以材能陵物勿以富貴驕人惟忠惟孝保家保身始封

中山王歷龍化州饒建宜平州節度使改封晉王薨

按遼

史察克齊初封中山王進封潞又進封魏不云封晉王今姑仍舊文以備參考

燕王洪道

燕王洪道小名辰德赫

按遼史道宗母弟二人其長者名和囉噶此云名辰德赫與史

不同姑仍之
以備參考

道宗同母弟也頗有武畧庫莫奚侵擾詔

洪道討之洪道伏兵林中佯敗而走奚掠輜重洪道與

伏兵合擊之盡殪後渤海高顏樂反又命洪道討之終

於燕京留守封燕王

按遼史道宗母弟二人皆無封燕者其為南京留守者為和囉噶初

封中山王改封晉蓋時人以其守燕稱為燕王若

其子溥稱燕王之比鄰國傳聞遂誤謂封燕耳

梁王信寧

梁王信寧小名嘉哩北大王烏爾罕之子始以狄候郎

君授林身雲州奉聖州蔚州節度使同平章事與帝同

謀逐太后出宮拜南大王北大王特哩袞南宰相封梁
王加尚父致仕

欽定重訂契丹國志卷十四

欽定四庫全書

欽定重訂契丹國志卷十五

外戚傳

述律羅索

舒嚕羅索太祖皇后兄也蕃部人世為酋長少壯武有
膽畧部人憚之從太祖平奚有功授統軍使盧文進自
新州來奔太祖歲入燕雲羅索以兵從又從圍周德威
於幽州機巧善智城幾克會救至退師改授奚王府監

軍東路兵馬都統軍子庫哩尚鄂格公主

蕭延思

蕭延思涿州人太宗皇后父也少習武藝有材力能左右馳射自太祖時從平諸蕃嘗單騎數十深入敵陣屢戰有功太宗南拔石晉時已死矣太宗每嘆曰斯人尚在中原不足平也官終北面都部署遼興軍節度使

蕭翰

按原書蕭翰在列傳以傳考之翰為舒嚕太后之姪人為世宗后兄宜在外戚今移

正又按此傳言翰為世宗后兄太宗紀言翰林為太宗后前後抵牾考遼史太宗后蕭氏欽淳

太后弟之女似
當以紀為允

蕭翰本國人舒魯太后之兄子也其妹復為世宗后翰始以蕭為姓自是契丹后族皆稱蕭氏翰最殘忍工騎射太宗與張敬達交鋒翰等自東北起衝唐兵為二唐兵大敗步兵死者萬人太宗南入大梁以天時向暑難久留欲留親信一人為節度使百官請迎太后太宗曰太后族大如古柏根不可移也又欲盡以晉百官自隨恐搖人心乃詔有職事者從行餘留大梁復以汴州為

宣武軍翰為節度使滋德宮有宮人五十餘人翰欲取之官者張環不與翰破鎖奪宮人執環燒鐵灼之腹爛而死初翰聞漢劉知遠擁兵而南欲北歸恐中國無主必大亂已不得從容而去時唐明宗子許王從益與王淑妃在洛陽翰遣高謨翰迎之矯稱太宗命以從益知南朝軍國事召已赴幽州從益淑妃匿於巖陵下宮不得已而出至大梁翰立以為帝帥羣臣拜之立百官留燕兵千人為從益宿衛翰乃辭行翰至恒州以兵圍張

礪之第滿達以大臣不可專殺乃止

蕭守興

蕭守興小名烏爾古侍中嘉哩布長子也始為祗候郎君林牙左宣徽使景宗居藩冊守興女為妃即位冊立為后守興以后父為侍中共當國政是時景宗嬰疾北漢見僭叛悉平宋人侵逼屢遣蠟丸求援而守興柱石非材兵勢少弱石嶺關南之敗喪萬餘人後又遷尚書令封魏王任遇彌隆守興年既昏耄事多徇私吏呈案

有字畫微訛者輒抉摘示明朝廷以此患之畏后不敢言

蕭孝穆

蕭孝穆小名辰陸儀天皇后兄也初后選入宮為聖宗夫人授大將軍后封元妃遷北府宰相燕王孝穆機悟有才藝馳馬立射五的時人莫能及聖宗在位喜其忠謹與參軍國大謀時渤海反於東京有衆數萬命孝穆為行營兵馬都統討之部長蘇實珍柵於金閭山上險

竣不可攻考穆為宣揚恩意聞其自新凡所招降七萬餘戶而還以功授東遼王聖宗疾亟急召赴闕聖宗崩以輔立功封晉王又納女為興宗后授樞密使楚國王

按遼史考穆初封燕王為南京留守封大延琳凱旋封東平郡王又進封吳又進封晉卒贈齊國王與此不同然燕王乃國王東平乃郡王考穆有功改封不應自國王降為郡王蓋遼時守南京者俗皆謂之燕王實非封燕此乃史之誤耳今仍此書舊文以備參考

蕭安札

蕭安札小名纒古燕京統軍使達爾瑪之子達爾瑪於

統和中攻宋澶州為矢所中死城下安札以父戰功為祗候郎君遷林牙契丹諸行宮都部署又遷彰國節度使安札雖家門貴盛而虛已接物汲引諸名士時論賢之宋張昇來使安札以侍中為館伴從容言兩朝盟好誓若山河毋以小嫌遽傷大信與昇談論移日曲盡其懽昇亦云侍中北朝儀表也深敬異之後授北府宰相宣徽使封鄭王

欽定重訂契丹國志卷十五

欽定四庫全書

欽定重訂契丹國志卷十六

列傳

韓延徽

韓延徽幽州人也仕劉仁恭為幽州觀察支使後又事
守光為幕府參軍守光與六鎮構怨自稱燕帝延徽諫
之不從守光置斧鑕於庭曰敢諫者斬孫鶴力諫守光
殺之延徽以幕府之舊且素重之得全守光末年衰困

盧龍巡屬皆入於晉遣延徽來求援太祖怒其不拜留之使牧馬於野延徽有智畧頗知屬文舒嚕太后言於太祖曰延徽能守節不屈此今之賢者奈何辱以牧馬宜禮用之太祖召延徽與語悅之以為謀主舉動訪焉延徽始教太祖建牙開府築城郭立市里以處漢人使各有配偶墾荒田由是漢人各安生業逃亡者益少太祖咸服諸國延徽有助焉頃之延徽逃奔晉王晉王欲置之幕府掌書記王絨疾之延徽不自安求東歸省母

過真定止於鄉人王德明家德明問所之延徽曰今河北皆為晉有當復詣契丹耳德明曰叛而復往得毋取死乎延徽曰彼自吾歸如喪手目今往詣之彼手目復完安肯害我既省母遂復來歸太祖聞其至大喜如自天而下拊其背曰鄉者何往延徽曰思母欲告歸恐不聽故私歸耳太祖待之益厚及即位以延徽為相累遷至政事令

按原書作中書今考遼史作政事令蓋遼初有政事令重熙十三年始改中書今改正

晉王遣使來延徽寓書於晉王叙所以北去之意且曰

非不戀英主非不思故鄉所以不留正懼王絨之讒耳
因以老母託之且曰延徽在此契丹必不南牧故終同
光之世兵不南伐延徽之力也後太宗拔石晉得幽燕
以延徽兼樞密使同平章事後數年卒

張礪

張礪磁州滏陽人也唐魏王繼岌伐蜀時為掌書記繼
岌死礪詣王府慟哭久之唐主從珂時為翰林學士石
敬瑭叛唐主以趙德鈞為行營招討礪以翰林學士為

招討判官援張敬達於河東及敬達敗礪隨德鈞來降
太宗復以為翰林學士礪事太宗甚忠直遇事輒言無
所隱避太宗甚重之後逃歸為追騎所獲太宗責通事

高彥英且答之而謝礪

按原書叙張礪逃歸復獲事並與太宗紀同今節刪以省繁復

是年太宗會同改元參用中國人為公卿百官以礪為
翰林承旨兼史部尚書太宗既入大梁諸將恣橫肆行
殺戮如蕭翰滿達耶律朗烏之類縱兵殺掠尤甚礪言
於太宗曰今大遼已得天下中國將相宜用中國人為

之不宜用北人及左右近習苟政令乖失則人心不服
雖得之猶將失之太宗不從後改除為右僕射兼門下
侍郎同平章事大兵北歸回居恒州滿達以鐵騎圍其
第礪方卧病出見之翰數之云汝何言於先帝云北人
不宜為節度使又吾為宣武節度使且國舅也汝在中
書乃帖我又先帝留我守汴州令我處宮中汝以為不
可又譖我及嘉哩於先帝云嘉哩好掠人財我好掠人
子女我必殺汝命鎖之礪抗聲曰此皆國家大體吾實

言之欲殺即殺矣以鎖為滿達以大臣不可專殺力救止之翰乃釋之是夕礪憤恚而卒

趙延壽

趙延壽相州人也父德鈞事唐為盧龍節度使石敬瑭叛與我兵會擊張敬達唐主從珂令德鈞將幽州兵由飛狐出我兵後德鈞密來約降許以厚賂云若立己為帝即請以見兵南平洛陽與契丹為兄弟國太宗以晉安未下欲許德鈞之請晉高祖亟使桑維翰入說太宗

太宗從之指帳前石謂德鈞使者曰我已許石郎此石爛方可改也會太宗至潞州德鈞父子迎謁於高河太宗問德鈞曰汝在幽州所置銀鞍契丹直何在德鈞指示之太宗命盡殺之於西郊凡三千人遂鎖德鈞延壽送歸上京德鈞見舒嚕太后悉以所齎寶貨并籍其田宅獻之太后問曰汝近者何為往太原德鈞曰奉唐主之命太后指天曰汝從吾兒求為天子何妄語耶又自指其心曰此不可欺也又曰吾兒將行吾戒之云趙大

王若引兵北向渝關亟須引兵歸太原不可救也汝欲
為天子何不先擊退吾兒徐圖亦未晚汝為人臣既負
其主不能擊敵又欲乘亂邀利所為如此何面目欲求
生乎德鈞俯首不能對又問器玩在此田宅何在德鈞
曰在幽州曰今屬誰德鈞曰屬太后太后曰然則又何
獻焉德鈞益慙自是鬱鬱不多食踰年而死德鈞既卒
太宗釋延壽而用之其後會同改元叅用番漢以延壽
為樞密使尋兼政事令太宗遣使如洛陽取延壽妻唐

興平公主以歸

按原書作唐公主不
著封號今據通鑑補

會同六年以延壽

為盧龍節度使是時晉主重貴初立背盟構釁延壽欲
代晉帝中國屢說太宗擊晉太宗頗然之乃集山後及
盧龍兵合五萬人使將之委之經畧中國曰得之當立汝
為帝又嘗指延壽謂晉人曰此汝主也延壽信之由是
每事盡力會同八年延壽與其弟延照兵五萬南征逼
貝州臨之吳巒死所殺且萬人太宗逼澶州屯元城延
壽屯南樂以延壽為魏博節度使封燕王會同十一年

太宗南征晉軍來降太宗悉收其鎧仗數萬貯恒州驅馬數萬歸國遣杜重威將其衆從已而南及河太宗以晉兵之衆恐其為變欲悉以鐵騎擁而納之河流或諫曰晉兵在他所者尚多彼聞降者盡死必皆拒命為患不若且撫之徐思其策太宗乃使重威以其衆屯陳橋會久雪官無供給士卒凍餒咸怨重威相聚而泣重威每出道旁人皆罵之太宗猶欲誅晉兵延壽言於太宗曰皇帝親冒矢石以取晉國欲自有之乎將為它人取

之乎太宗變色曰朕舉國南征五年不解甲僅能得之
豈為他人乎延壽曰晉國南有唐西有蜀常為仇敵皇
帝亦知之乎曰知之延壽曰晉國東自沂密西及秦鳳
延袤數千里邊於吳蜀常以兵戍之南方暑濕上國人
不能居也他日車駕北歸以晉國如此之大無兵守之
吳蜀必相與乘虛入寇如此豈非為他人取之乎太宗
曰朕不知也然則奈何延壽曰陳橋降卒可分以戍南
邊則吳蜀不能為患矣太宗曰朕昔在上黨失於判斷

悲以唐兵授晉既而返為仇讐北向與吾戰辛勤累年
僅能勝之今幸入吾手不因此時除之豈可復留以為
患乎延壽曰彛留晉兵於河南不質其妻子故有此憂
今若悉徙其家於恒定雲朔之間每歲分番使戍南邊
何憂其為變哉此上策也太宗悅曰善惟大王所以處
之由是陳橋兵始得免分遣還營


按原書叙趙延壽論
陳橋兵事前後復出

今刪
正

太宗初許延壽代晉後負約恨之謂人曰我不復

入龍沙矣太宗崩延壽偽稱受太宗遺詔權知南朝軍

國事世宗鎖之後二年延壽乃卒



欽定重訂契丹國志卷十六

欽定四庫全書

史部

欽定重訂契丹國志卷

十七至二十一

詳校官庶吉士_臣張溥

編修_臣裴謙覆勘

總校官舉人_臣章維桓

校對官編修_臣孫希旦

謄錄監生_臣曾鏞

欽定四庫全書

欽定四庫全書

列傳

滿達

滿達太宗之從弟也會同九年遣兵攻黎陽滿達先驅

晉博州刺史周儒以城降柔後周儒引滿達自馬家口

濟河營於東岸攻鄆州北津又陷德州擒刺史尹居璠

太宗南入大漠以滿達為安國節度使又以為中京留

守至恒州崔廷勳見滿達趨走拜起跪而獻酒滿達踞而受之滿達貪殘猾忍民間有珍貨美女必奪取之又捕村人誣以為盜披頰抉目斷腕焚炙而殺之欲以威衆常以其具自隨左右前後懸人肝膽手足飲食起居於其間語笑自若出入或被黃衣用乘輿服御物曰茲事漢人以為不可吾國無忌也又以宰相員不足乃牒馮道判史館李崧判宏文館和凝判集賢劉煦判中書其僭妄如此然所部兵或犯法無所容貸故市肆不擾

常恐漢人亡去謂門者曰漢人有窺門者即斷其首來
滿達遣使督運於洺州洺州防禦使薛懷讓聞漢主入
大梁殺其使者舉州降漢主遣兵萬人會懷讓攻劉鐸
於邢州不克鐸請兵於滿達遣其將楊安及前義武節
度使李殷將千騎攻懷讓於洺州懷讓嬰城自守安等
縱兵大掠於邢洺之境我兵留守者不滿一千滿達令
所司給萬四千人食收其餘以自入滿達常疑漢兵且
以為無用稍稍廢省又損其食以飼北兵衆心怨憤漢

兵謀攻滿達猶豫未決會楊衮楊安等軍出我兵留恒
州者僅八百人何福進等遂決計未幾世宗有詔召馮
道李崧會葬太宗漢兵因突入府中焚衙門與我兵戰
會日暮有村民數千噪於城外欲奪我兵寶貨婦女我
兵懼而北遁滿達剽掠雀走勳皆奔定州與義成節度
使耶律忠合滿達尋歸世宗殺之

按遼史滿達殺世宗自立不克而死此言

世宗殺之疑屬誤
已於世宗紀辨正

耶律朗烏

耶律朗烏即耶律忠遠帝族人也太宗南攻石晉朗烏
扈從累有戰功太宗入大梁以朗烏為鎮寧節度使朗
烏性殘虐澶州人苦之賊師王瓊率其徒千餘人襲據
南城北渡浮航縱兵大掠圍朗烏於牙城朗烏聞漢平
鄴誅杜重威常懼南人為變未幾朗烏與滿達等焚掠
定州悉驅其人棄城北去方廣千里剽掠殆盡

劉珂

按原書劉珂在外戚傳以傳考之珂特
尚主非后妃親屬不得為外戚今移正

劉珂平章事晞之次子也尚世宗妹燕國公主少善射

以材能稱性謹重未嘗有過為太宗所知太宗念石晉
負恩連年南伐戰定州時深入帝馬陷泥濘中珂下馬
奉帝出身被數十瘡流血滿體太宗壯之遷林牙行宮
都部署西北路兵馬招討使從入大梁授同知京府事
尋授漢人樞密使封吳王

欽定重訂契丹國志卷十七

欽定四庫全書

欽定重訂契丹國志卷十八

列傳

盧文進

盧文進字大用幽州范陽人也文進身長七尺偉儀容
太宗與晉王構怨時晉王遣周德威攻幽州文進以騎
先降拜蔚州刺史是時李存矩統山後八軍為新州團
練使晉王時在河上與劉鄩血戰召新州兵存矩募山

後勁兵數千人驍勇難制又課民出馬以十牛易一馬
民怨之入骨山後兵又憚遠行至祁溝聚謀作亂文進
有女少而艷存矩求為側室文進不敢違而心常內愧
因與亂軍殺存矩攻新州不克遂帥其衆來奔後引我
軍攻新州刺史安金全不能守棄城去周德威援之進
攻新州我兵數萬守之德威不勝大敗奔歸文進與我
兵進攻幽州圍城且二百日城中危困晉王親將兵救
之始解歸乃以文進為幽州節度使又以為盧龍節度

使文進在新州歲歲以輕騎出入塞上攻掠剽奪無有
寧歲幽瀛涿莫間常被其患又以中國織絨之法教國
人工作無不備由比益強南兵屯涿州時饋運自瓦橋
關至幽州巖設界堠常苦抄奪為邊患者十餘年皆文進
所為也後奔南唐初文進進攻新州不克夜走墜壑一
躍而出明日視之乃郡之黑龍潭也絕岸數丈深不可
測又常有大蛇徑至座間引首及膝文進取食飼之而
去由是自負往來南北無挫劬焉

耶律隆運

耶律隆運本漢人姓韓名德讓祖知古加右僕射中書令父匡嗣追封秦王隆運性忠愿謹愨智畧過人景宗嬰疾后與決國事雅重隆運擢授東頭供奉官充樞密院通事尋轉上京皇城使超授遼州節度使代其父匡嗣為上京留守又遷平州節度使改樞密使兼行營都部署隆運自在景宗朝翼決庶政景宗疾亟隆運不俟詔密召其親屬等十餘人並赴行帳時諸王宗室二百

餘人擁兵握政盈布朝廷后當朝雖久然少援助諸皇子幼穉內外震恐隆運請於后易置大臣勅諸王各歸第不得私相燕會隨機應變奪其兵權時趙王等俱在上京隆運奏召其妻子赴闕景宗崩事出倉卒布置已定乃集蕃漢臣僚立梁王隆緒為皇帝時年十二後為

聖宗

按原書誤作興宗今改正

仍尊后曰仁慈翊聖應天皇太后尋

以輔立功守司徒同政事進封楚王賜耶律氏及賜名隆運未幾拜大丞相充契丹漢兒樞密使南北面諸行

營都部署改封齊王隆運孜孜奉國知無不為忠孝至誠出於天性帝以隆運輔翼功前後少比乃賜鐵券誓文躬自親書齋戒焚香於北斗星下讀之宣示蕃漢諸臣又以隆運一族附籍橫帳列於景宗廟位契丹橫帳猶宋朝玉牒所也隆運自為相以來結懽宋朝歲時修睦無少間隙帖服中外靡有邪謀未幾改封晉王授尚書令賜以几杖入朝不拜上殿不趨左右護衛特置百人國制護衛惟皇帝有之帝以隆運勲大恩數優渥見

則盡敬至父事之秦魯二王每日一問起居至隆運所居帳二里外已去蓋下車徒步而進暨其面也列揖於帳外隆運坐而受之帝或至其帳亦五十餘步下車隆運出迎盡禮帝亦先為之揖及入內同家人禮飲膳服飾盡一時水陸珍器諸國爭為奇怪入貢動駭耳目隆運疾帝與太后禱告山川名蕃漢名醫診視朝夕不離左右及薨帝與后諸王公主已下并內外臣僚制服行喪葬禮一依承天太后故事靈柩將發帝自挽輜車哭

送羣臣泣諫百餘步乃止葬乾陵側詔影堂制度一同
乾陵又詔諸處應有景宗御容殿皆以隆運真容置之
殿內其眷遇始終無與比倫有如此者隆運兄弟九人
緣翼戴恩超授官爵皆封王諸姪三十餘人封王者五
人餘皆任節度使部署等官隆運薨無子帝特以皇姪
周王宗業紹其後

宗業本齊國
王隆祐之子

始封廣王未幾封周王

歷中京留守平州錦州節度使宗業薨葬乾陵側宗業
無子帝復以周王同母弟宗範繼隆運後歷龍化州節

度使燕京留守封韓王

劉六符

劉六符平州人也年十五究通經史兼綜百家之言長而喜功名慷慨有大志歷事聖宗朝為著作郎中允又為詹事國子祭酒興宗時為翰林學士右諫議大夫知制誥同修國史先是宋人伐夏兵久不決六符以宋朝為怯又知李士彬劉平之兵屢敗宋朝盱食積苦兵間因勸帝聚兵幽涿聲言南征而六符及蕭英先以書至

宋索闕南十縣其書皆六符所撰也書至宋朝以富弼為回謝使弼至穆丹河六符館之謂弼曰北朝皇帝堅欲割地如何弼曰北朝若欲割地必志在敗盟南朝決不從有橫戈相待耳六符曰南朝若堅執則事安得濟弼曰南朝不發兵而遣使好辭更議嫁女並幣豈堅執乎六符引弼入見往復辯議興宗大感悟乃從弼所請是年八月宋再遣富弼齎國書誓書至清泉淀金瓊館許增以歲幣二十萬時帝固惜盟好惟六符畫策揚聲

聚兵幽涿以動宋宋方困西夏之擾名臣猛將相繼敗
衄呂夷簡畏之我國遂得增歲幣至五十萬勒碑紀功
擢六符同中書門下平章事後出為長寧軍節度使復
名為三司使子孫顯貴不絕為節度觀察使者十數人

按原書敘六符官位多
與史不合今並改正

欽定重訂契丹國志卷十八

欽定四庫全書

欽定重訂契丹國志卷十九

列傳

馬保忠

馬保忠營州人也疏眉目豐下謹重寡慾斤斤自修州人賢其行自力讀書不謁州縣節用以給親里大穰則振其餘於鄉黨太平年間授洗馬改著作郎殿中丞興宗朝為樞密使尚父守太師兼政事令封燕國公時朝

政不綱溺志浮屠僧至有正拜三公三師者官爵非人
妄有除授保忠嘗從容進諫帝至佛然怒之

詳見
帝紀又嘗

上言強天下者儒道弱天下者吏道今之授官大率吏
而不儒崇儒道則鄉黨之行修修德行則冠冕之緒崇
自今其有非聖帝明王孔孟聖賢之教者望下明詔痛
禁絕之其篤意風教如此後數年保忠卒賜諡曰剛簡

張琳

張琳潘州人也為人忠義慷慨有大志在道宗朝為秘

書中允天祚立兩為戶部使負東京人望金兵既起高永昌繼叛於渤海時天慶六年也永昌據遼東五十餘州盡沒獨瀋州未下琳痛念鄉粉欲自討之契丹屢敗精兵銳卒千無一存琳討永昌搏手無策始招所謂轉戶軍益遼東渤海乃夙所讐若其轉戶則使從良庶幾捐軀奮命命下得兵二萬餘琳自顯州進兵渤海止備遼河三义口琳遣羸卒數千陽為來攻間道以精騎渡河直趨瀋州渤海始覺三十餘戰渤海乃走保東京其

後金人授至師自驚恐望風而潰失亡不可勝計琳遁入遼州謫授遼興軍節度使乃平州也其後授燕京副留守與燕國王溥守燕溥僭立改元命琳守太師十日一朝平章軍國大事實疎之也琳竟鬱鬱而卒

蕭奉先

蕭奉先天祚元妃之兄也嗣先保先皆其弟奉先在道宗朝為內侍供奉又為承旨歷吏部尚書緣恩宮掖專尚諂諛朋結中人互為黨與至天祚朝毬獵聲色日盛

其心防微不早金兵始起奉先時為政事令同平章事
又兼樞密使方混同江諸蕃大會之時天祚已疑阿固
達密謂奉先曰阿固達意氣雄豪顧視不常當以事誅
之不然恐貽後患奉先曰阿固達麓人何知殺之傷向
化心設有異志蕞爾小國何能為天祚乃止天慶四年
阿固達始舉兵屠寧江州次年阿固達又至弟嗣先以
殿前都點檢充東北路招討使蕭托卜嘉副之未陣而
潰既而出河店之戰嗣先又敗詣闕請罪但免官而已

由此士無鬪志望風奔潰保先亦奉先弟也為渤海留
守少師政令嚴酷亦為叛兵所殺渤海始亂天慶九年
金兵陷上京發掘陵寢取其金銀珠玉奉先皆仰而
不奏天祚問及陵寢事奉先對以初雖侵犯元宮不敢
毀壞陵寢其蒙蔽欺罔類皆如此又誣告耶律伊都欲
立晉王伊都叛奉先曰伊都宗枝非欲亡遼者不過求
立晉王耳天祚惑之賜王死聞者皆揮涕衆心益離奉
先柄國垂二十年以至國亡天祚奔夾山謂奉先曰誤

我至此皆汝之罪宜亟去不然恐汝及禍并累我行未
十里為左右執送金兵金兵送奉先及其次子昱於金
帝道遇我兵奪歸天祚並賜死

按原書言奉先為左右所殺今據遼史改正

李儼

李儼本析津人天祚嬖臣也少而狡桀倜儻不羣軒然
夷倨才濟其奸與蕭奉先雅相厚善初為內侍省給事
累遷至中書供奉積官至南面宰相封漆水郡王儼資
性猾巧善諛佞人在天祚朝秉國樞柄凡十五年金人

連年用兵儼與奉先蒙蔽為欺以至於亡天祚不悟也儼嘗與知樞密院事牛溫有隙各進所親厚朋黨紛然恃奉先為內主溫不能勝及儼死奉先又薦其姪處溫竟至亡國惜也儼不逮藁街之戮云

耶律伊都

耶律伊都一名伊勒都喀遼之宗室其妻天祚文妃之妹也文妃生晉王最賢蕭奉先忌之誣告伊都謀立晉王伊都叛歸金金人以為西軍大監軍久不遷常鞅鞅

有異志率兵屯和勒端城失其金牌金人疑其與林牙

暗合遂質其妻子伊都有叛心天會十年

按原書作明年九月上文

叙伊都事皆不著何年則明年之文無所承今據金史改正

約燕軍統軍反統軍之

兵皆契丹人伊都謀誅西軍之在雲中者盡約雲中河

東河北燕京防守之契丹漢兒令誅女直之在官在軍

者天德知軍偽許遣其妻告金時烏紳為西監軍自雲

中來燕微聞其事而未信與通事漢兒納延回行數百

里納延見二騎馳甚遽問之曰曾見監軍否以不識對

問為誰曰伊都下人納延追及烏紳曰適兩契丹云伊

都下人既在西京何故不識監軍

北人稱雲中為西京

恐有奸謀

遂回馬追獲搜其靴中得伊都書曰事已泄宜便下手

復馳告烏紳即回燕統軍來謁縛而誅之又二日至雲

中伊都微覺父子以遊獵為名遁入夏國夏人問有兵

幾何云親兵二三百遂不納投鞬鞬鞬先受烏紳之

命其首領詐出迎具食帳中潛以兵圍之鞬鞬善射無

衣甲伊都出敵不勝父子皆死預謀者悉誅契丹之黠

及漢兒之有聲者皆不免

達實

達實林牙者乃其官名猶南朝翰林學士達實則其名也達實既降金與尼雅滿為雙陸戲爭道相忿尼雅滿心欲殺之而口不出達實懼及既歸帳則棄其妻攜五子宵遁詰旦尼雅滿怪達實日高不來使召之其妻曰昨夕以酒忤大人畏罪而竄詢其所之不以告尼雅滿大怒以配部落之最賤者妻不肯屈強之極口嫚罵遂

射殺之達實深入沙子立天祚之子梁王為帝而相之

金遣伊都帥兵經畧屯田於和勒端城

城去上京
三千里

達實

游騎數十出入軍前伊都遣使打話遂退沙子者蓋不

毛之地皆平沙廣漠風起揚塵至不能辨色或平地頃

刻高數丈絕無水泉人多渴死達實之走凡三晝夜始

得度故金人不敢窮追遼御馬數十萬牧於磧外金人

以絕遠未之取皆為達實所得今梁王達實皆亡餘黨

猶居其地

按遼史係大三年天祚渡河奔夏耶律迪里
等剋梁王雅里奔西北部共立為帝未踰年

卒而達實林牙自古北口亡去為金所執旋自金歸天
祚於夾山天祚欲出兵達實諫不聽自立為王率鐵騎
北行又西至起兒漫文武百官冊立為帝是為西遼是
達實初未與立梁王而梁王亦未嘗隨達實西行也此
傳所載皆無足信者今
姑存之而加辨正云

蕃將除授職名

高唐英

彰德節度使

劉晞

嘗為樞密
平章事

西京留守

崔廷勳

大同節度使

耿崇美

昭義節度使

高謨翰

河陽節度使

蕭哈沁

世宗妻弟

幽州節度使

潘伊爾諾

世宗姊婿

橫海節度使

楊訥默庫

契丹通事

忻州節度使

瑠珠

世宗弟

義成節度使

楊袞

武定節度使

漢官除授職名

韓紹芳

同平章事

竇振

三司使

韓超昇

宣徽南院使

耿元吉

戶部使

劉元

兵部尚書知上京留守

劉四端

禮部尚書叅知政事簽書樞密院事

張克忠

守司徒兼侍中知樞密院事

韓紹雍

行宮都部署兼侍中

欽定重訂契丹國志卷十九